

DEKLARATA PROGRAMORE E LEVIZJES PER DREJTESI (LD)

Lëvizja për Drejtësi e Kosovës, është subjekt politik i bazuar në bashkim vullnetar të qytetarëve të Republikës së Kosovës, të bazuar mbi konceptin e një Demokracie Konservatore ku themeli i saj është Drejtësia dhe Barazia, i përcjellur ngushtë me zhvillimet dhe proceset demokratike, politike, ekonomike, sociale në vend, të frymëzuar nga vlerat e lirisë së individit, të fjalës së lirë, të shprehjes së mendimit kritik, të bindjes së lirë, të manifestimit dhe mbrojtjes së identitetit kombëtar, fetar e tradicional, të përkushtuar në fuqizimin e shtetit të së drejtës dhe të institucioneve me një qeverisje të Drejtë dhe të ndershme nga qytetarët e Republikës së Kosovës.

Lëvizja për Drejtësi e Kosovës, vepron në bazë të orientimeve dhe parimeve politike të një demokracie konservatore, e orientuar si parti politike e qendrës së djathtë, që respekton dhe angazhohet për vlera të identitetit kombëtar, shtetëror, familjar, për liri dhe tolerancë fetare dhe për një shtet të fuqishëm të së drejtës.

Programi i Lëvizjes për Drejtësi, themel të saj ka pesë shtyllat programore, duke përmblodhur ngusht gjitha nevojat e qytetarëve të saj, duke u nisura nga ruajtja, promovimi dhe garantimi i vlerave të besimit të cdo qytetari të saj, vlerat e familjes, sigurin e pronës, pasurisë dhe forcimin e shtetit mbi shtrirjen institucionale jo vetëm në Republikën e Kosovës por edhe përtej saj, në cdo vend ku flitet shqip e ka rrënjë të shqiptarisë.

Lëvizja për Drejtësi, mbetet e angazhuar për një Kosovë të anëtarësuar në gjitha mekanizmat ndërkombëtar relevant, duke forcuar themelin e shtetit në arenën ndërkombëtare të kombeve të lira e demokratike, e të njëjtën kohë të mbështes misionet ndërkombëtare karshi nevojave globale si një shtet që promovon dhe garanton drejtësi dhe barazi për të gjithë.

Kultura, Feja dhe trashëgimia kulturore

Besimi i lirë është e drejtë e secilit individ. Nisur nga kjo ne konsiderojmë që Kosova duhet të jetë vend ku pjesëtarët e shoqërisë ushtrojnë lirshëm bindjet dhe ritet e tyre fetare, dhe të lirë nga paragjykimet.

Lëvizja mbështet: ruajtjen e identitetit kulturor të kombit si interes kombëtar; shumëllojshmërinë dhe diversitetin e kulturave, qytetërimeve, gjuhëve dhe popujve, si dhe pluralizmin ideologjik dhe fetar, si mundësi për njohjen më të mirë të ndërsjellë; kulturën e dialogut, si garanci për paqe dhe prosperitet; dhe bashkëjetesën kulturore ndërmjet shumicës shqiptare dhe bashkësive të tjera etnike në Kosovë.

Lëvizja ka si mision: integrimin e vazhdueshëm të vlerave kulturore në identitetin qytetar të shtetasve të Kosovës; depolitizimin e institucioneve kulturore; ruajtjen dhe kultivimin e vlerave të mirëfillta kulturore; ngritjen e standardeve etike dhe kulturore të shoqërisë; eliminimin e vlerave të dyshimta; dhe promovimin e dialogut ndërkulturor, me synim që t'i shërbehet afirmimit më të madh të kombit dhe pasurimit të jetës shpirtërore të njerëzve, krahas demokratizimit të shoqërisë.

Lëvizja në këtë drejtim bënë: promovimi i vlerave kulturore dhe ruajtja e trashëgimisë, shpirtërore dhe materiale; projektet kulturore si pjesë e marrëveshjeve ndërshtetërore; shtimi i buxhetit për institucionet e kulturës, në nivelin qendror dhe komunal; përkrahja e nismave dhe organizimeve, që kanë për qëllim zhvillimin e gjithmbarshëm të kulturës; promovimi i dialogut ndërkulturor në të gjitha nivelet; shtimi i resurseve menaxheriale; përkrahja e mediave publike dhe private që angazhohen për ruajtjen dhe përparimin e identitetit kulturor të qytetarëve; përkrahja e aktiviteteve të shoqërisë civile që janë në funksion të afirmimit të vlerave të traditës kombëtare e shpirtërore; përkujdesja, ruajtja dhe mbrojtja e vlerave kulturore tradicionale, duke përfshirë mbrojtjen institucionale të monumenteve fetare dhe kulturore-historike; dhe digjitalizimi i institucioneve kulturore.

Lëvizja angazhohet për themelimin e Ministrisë për Fetë si dhe zyrtarizmin ligjor dhe përkrahjen institucionale të bashkësive tradicionale fetare: Bashkësisë Islame të Kosovës, Ipeshkvisë së Kosovës; dhe Kishës Ortodokse Serbe; si dhe të bashkësive fetare që me përmasat e anëtarësisë së tyre imponohen në jetën shoqërore të vendit. Po ashtu duhet të ndalohet rreptësisht dhe

luftohet diskriminimi ndaj cilitdo pjesëtar të shoqërisë në bazë të besimit apo filozofisë së veçantë të të jetuarit të zgjedhur nga ajo/ai.

Familja dhe Shoqëria

Lëvizja për Drejtësi prioritet të veçantë i kushton ruajtjes së familjes dhe nocionit të saj duke konsideruar si vatër e vlerave morale dhe etike të shoqërisë dhe vet shtetit të Republikës së Kosovës. Roli i gruas, nënës në familje si mision i shtetit është i pazëvendësueshëm dhe vet shteti nuk mund të ekziston pa familjen.

Lëvizja për Drejtësi promovon dhe angazhohet për mbrojtjen dhe afirmimin e traditave pozitive dhe vlerave familjare si bazë për një shoqëri të qëndrueshme dhe të shëndetshme.

Ne angazhohemi në mbrojtjen e të drejtave dhe të lirive të gruas, nënës dhe fëmijëve si dhe në përmirësimin e kushteve të tyre jetësore.

Ne angazhohemi në parandalimin e të gjitha dukurive negative shoqërore, me theks të veçantë në luftimin e fenomeneve devijuese të shoqërisë si alkoolizmi, narkomania dhe prostitucioni.

Lëvizja për Drejtësi prioritet të veçantë i kushton ruajtjes së familjes si vatër e vlerave morale dhe etike dhe faktor i rëndësishëm në ngritjen dhe edukimin e njeriut. Roli i gruas në këtë mision është i pazëvendësueshëm. Gruaja që lind dhe me sukses e ngrit dhe edukon pasardhës kryen një rol të rëndësishëm shoqëror.

Lëvizja për Drejtësi angazhohet për mbrojtje të posaçme të gruas dhe të nënave me më shumë se tre fëmijë në aspektin e kujdesit shëndetësor, përfitimeve nga fondet publike për fëmijë, njohja e stazhit punues dhe mundësia e punës me orar të shkurtuar.

Sistemi Politik dhe Shteti Ligjor

Lëvizja për Drejtësi angazhohet për mundësi të drejta dhe të barabarta të secilit qytetar për respektimin e të drejtave të njeriut, për sundim të ligjit duke respektuar pavarësinë dhe ndarjen e legjislativit, ekzekutivit dhe gjyqësorit.

Lëvizja për Drejtësi angazhohet për një sistem zgjedhor demokratik, të barabartë, të lirë dhe me votim të fshehtë, që mundëson legjitimitetin e plotë të përfaqësuesve të zgjedhur si në nivel lokal ashtu edhe qendror dhe për ushtrimin e përgjegjshëm të institucioneve të dala nga vota e lirë.

Mbrojtja dhe Siguria

Lëvizja për Drejtësi angazhohet për zbatimin e ligjit, sigurinë publike, të drejtat e qytetarëve, transparencën e plotë të institucioneve në pajtim me standardet demokratike dhe me të drejtat e njeriut të njohura ndërkombëtarisht. Lëvizja për Drejtësi angazhohet për inkuadrimin e Kosovës në mekanizma ndërkombëtar të sigurisë dhe për respektimin e të gjitha marrëveshjeve ndërkombëtare si dhe është për bashkëpunim me organe ndërkombëtare të sigurisë si rajonale ashtu edhe me gjerë.

Zhvillimi Ekonomik

Lëvizja për Drejtësi angazhohet për krijimin e mundësive dhe iniciativave private në bazë të parimeve të tregut të lirë dhe të konkurrencës së shëndoshë si dhe në krijimin e kushteve adekuate ekonomike dhe ligjore për lëvizjen e lirë të mallit, fuqisë punëtore dhe kapitalit financiar.

Lëvizja për Drejtësi angazhohet për promovimin dhe implementimin e politikave fiskale favorizuese për ekonominë e vendit që do të mundësonte zhvillimin e prodhuesve vendor dhe plasmanin e produkteve të tyre në tregjet regjionale.

Lëvizja për Drejtësi angazhohet për krijimin e kushteve favorizuese për investimet e huaja në mënyrë që ky kapital të mundësojë hapjen e vendeve të reja të punës dhe kapacitete prodhuese.

Lëvizja për Drejtësi angazhohet për përmirësimin e kornizës ligjore dhe zvogëlimin e burokracisë në raport me regjistrimin dhe funksionalizimin e bizneseve, me qëllim të inkurajimit të investimeve të huaja në ekonominë e vendit.

Lëvizja për Drejtësi angazhohet për përmirësimin e politikës agroindustriale dhe zhvillimin rural si interes strategjik kombëtar dhe mundësi për krijimin e vendeve të reja të punës, zhvillimin simetrik ekonomik dhe uljen e deficitit tregtar.

Lëvizja për Drejtësi inkurajon zhvillimin e ndërmarrjeve të vogla, të mesme dhe të mëdha, lehtësitë doganore, stimulon politikën eksportuese sidomos në fushat ku vendi ynë ka potencial si në industrinë bujqësore, ushqimore, metalurgjike, përpunimit të drurit dhe zhvillimin e turizmit në përgjithësi.

Lëvizja për Drejtësi angazhohet për mbrojtjen dhe menaxhimin e resurseve natyrore dhe mbrojtjen mjedisore me qëllim të baraspeshimit të kërkesave dhe nevojave për zhvillimin ekonomik dhe mbrojtjes së ambientit.

Lëvizja për Drejtësi angazhohet për privatizimin e ndërmarrjeve shoqërore dhe publike përmes një procesi të drejtë dhe transparent.

Politika Sociale dhe Shëndetësia

Lëvizja për Drejtësi angazhohet në përmirësimin e politikave shëndetësore duke ngritur si kapacitetet e institucioneve primare, sekondare dhe terciare shëndetësore ashtu si dhe kapacitetet profesionale.

Lëvizja për Drejtësi angazhohet që politikën shëndetësore të jenë në funksion dhe sa më afër qytetarit duke forcuar rolin e Qendrave të mjekësisë familjare dhe Spitaleve regjionale.

Lëvizja për Drejtësi angazhohet në uljen e shkallës së sëmundjeve dhe vdekshmërisë, nëpërmjet ngritjes së cilësisë të shërbimeve shëndetësore sipas standardeve bashkëkohore. Ngritja e kapaciteteve për kujdesin parësor shëndetësor është thelbësore për edukimin shëndetësor të familjes dhe për zbatimin e sistemit të informimit shëndetësor.

Lëvizja për Drejtësi angazhohet në krijimin e kushteve favorizuese legislative për funksionimin e sistemit shëndetësor në përgjithësi dhe të sistemit të sigurimit shëndetësor në veçanti.

Lëvizja për Drejtësi angazhohet për mirëqenie dhe mundësi të barabarta. Fondet për nevoja sociale duhet të përkojnë me mundësitë ekonomike, si dhe fondet ekzistuese të shpërndahen në mënyrë të drejtë dhe racionale.

Të sigurohen fonde të mjaftueshme për mbrojtjen e familjeve të dëshmorëve, veteranëve të luftës, invalidëve të luftës, viktimave civile të luftës, përmirësimin e statusit material dhe shoqëror të personave me aftësi të kufizuar dhe në veçanti të fëmijëve pa kujdes prindëror.

Lëvizja për Drejtësi angazhohet për avancimin e dialogut të hapur ndërmjet punëdhënësve, organizatave sindikale dhe qeverisë për përmirësimin e kushteve të punës si dhe për sigurimin e fondeve pensionale me qëllim të kthimit të dinjitetit të pensionistëve.

Angazhohet për reformimin e sistemit shëndetësor me aplikimin e sistemit shëndetësor alternativ dhe krahas sistemit ekzistues pensional edhe për atë pensional komercial.

Arsimi, Edukimi, Shkenca dhe Kultura

Arsimi, edukimi, shkenca dhe kultura janë shtyllat kryesore të një shoqërie dhe të një vendi që ndikojnë drejtpërsëdrejti në zhvillimin e përgjithshëm shoqëror dhe intelektual. Lëvizja për Drejtësi konsideron që sistemi arsimor i Kosovës nuk është i zhvilluar në nivel të mjaftueshëm andaj angazhohet për reformim të këtij sistemi në bazë të nevojave shoqërore për një arsim bashkëkohor.

Krahas ndërtimit të objekteve shkollore rol vendimtar ka edhe specializimi i punëtorëve arsimor dhe Lëvizja për Drejtësi angazhohet që punëtorët arsimor të gëzojnë status të merituar në shoqërinë kosovare.

Lëvizja për Drejtësi angazhohet për sistemin arsimor pa ndikime ideologjike. Ne vlerësojmë dhe respektojmë specifikat kulturore që duhet të përfaqësohen në sistemin edukativo-arsimor. Ne angazhohemi për një sistem unik, modern dhe cilësor të arsimit si dhe përpiqemi që të ndërtojmë një shoqëri të bazuar në dije dhe edukim në të cilën arsimi do të trajtohet si një nga aspektet kryesore të zhvillimit shoqëror dhe ekonomik.

Arsimi superior duhet të jetë në përputhje me standardet dhe kriteret e universiteteve evropiane, me qëllim që studentëve të sigurohet cilësia dhe mundësia për qasje në universitete jashtë vendit.

Ne angazhohemi për një trend bashkëkohor të zhvillimit të shoqërisë kosovare në përputhje me kërkesat dhe nevojat për zhvillim kulturor dhe shkencor duke investuar në arsimim profesional me qëllim të inkurajimit të projekteve kërkimore-shkencore.

Lëvizja për Drejtësi angazhohet që përmes projekteve efikase edukative të trajtoj edhe dukurinë e analfabetizmit, dhe të sigurojë arsimim të nevojshëm për çdo qytetar.

Vëmendje të veçantë do të kushtohet arsimimit të fëmijëve me nevoja të veçanta dhe të kategorive tjera.

Lëvizja për Drejtësi angazhohet për ruajtjen dhe promovimin e vlerave kulturore kombëtare dhe për këmbime të këtyre vlerave në nisma regjionale, evropiane dhe botërore.

Diversiteti kulturor dhe fetar i Kosovës konsiderohet si një thesar i cili duhet të promovohet dhe të shfrytëzohet si urë lidhëse ndërmjet komuniteteve dhe shteteve ballkanike dhe evropiane.

Lëvizja për Drejtësi angazhohet në depolitizimin e institucioneve kulturore, ruajtjen dhe kultivimin e vlerave të mirëfillta kulturore, ngritjen e standardeve etike dhe kulturore të shoqërisë, promovimin e dialogut ndërkulturor, ndëretnik dhe ndërfetar.

Lëvizja për Drejtësi angazhohet që të përfshihet në rrjedhat kulturore botërore dhe evropiane duke afirmuar dhe promovuar trashëgiminë kulturore të Kosovës. Vëmendje e veçantë do t'i kushtohet zhvillimit të teknologjisë informatike dhe aplikimin e të arriturave të saj në sistemin edukativo-arsimor.

Bashkëpunimi ndërkombëtar dhe Politika e Jashtme

Lëvizja për Drejtësi angazhohet fuqishëm që Kosova si një vend sovran dhe i pavarur, të kontribuoj në fuqizimin e bashkëpunimit regjional, me qëllim të promovimit të stabilitetit dhe prosperitetit regjional në frymën e synimeve për integrim evropian.

Lëvizja për Drejtësi promovon politikat e fqinjësisë së mirë dhe bashkëpunimit konstruktiv regjional. Kjo qasje paraqet parimet themelore të politikës për bashkëpunim regjional dhe ndërkombëtar.

Tradita, Familja dhe Shoqëria

Lëvizja për Drejtësi e Kosovës promovon dhe angazhohet për mbrojtjen dhe afirmimin e traditave dhe vlerave familjare si bazë për një shoqëri të qëndrueshme dhe të shëndetshme.

Ne angazhohemi në mbrojtjen e të drejtave dhe të lirive të gruas, nënës dhe fëmijëve si dhe në përmirësimin e kushteve të tyre jetësore.

Ne angazhohemi në parandalimin e të gjitha dukurive negative shoqërore, me theks të veçantë në luftimin e fenomeneve devijuese të shoqërisë si alkoolizmi, narkomania dhe prostitucioni.

Lëvizja për Drejtësi prioritet të veçantë i kushton ruajtjes së familjes si vatër e vlerave morale dhe etike dhe faktor i rëndësishëm në ngritjen dhe edukimin e njeriut. Roli i gruas në këtë mision është i pazëvendësueshëm. Gruaja që lind dhe me sukses e ngrit dhe edukon pasardhës kryen një rol të rëndësishëm shoqëror.

Lëvizja për Drejtësi angazhohet për mbrojtje të posaçme të gruas dhe të nënave me më shumë se tre fëmijë në aspektin e kujdesit shëndetësor, përfitimeve nga fondet publike për fëmijë, njohja e stazhit punues dhe mundësia e punës me orar të shkurtuar, etj.

Përfundimi

Kosova është duke kaluar nëpër sfida serioze politike dhe shoqërore drejt realizimit të synimeve shtetndërtuese. Problemet serioze politike, ekonomike dhe shoqërore ndikojnë negativisht në jetën e përditshme dhe në ardhmërinë e qytetarit. Me siguri se këto mund të tejkalohen fal formacionit tonë të ri politik, dinamik dhe vizionar i cili qytetarit synon të sjellë prosperitet, siguri dhe mirëqenie, dhe do të prijë proceseve dhe projekteve politike drejt të së ardhës së ndritshme.

Në këtë kohë mungesash të koncepteve të mirëfillta dhe zhvlerësimit të vlerave ku fjala e humb kuptimin, Kosova ka nevojë imediate për një botëkuptim të ri, të ndershëm dhe për një lëvizje të vendosur që paraprinë proceseve vendimmarrëse me kuadro të aftë për t'u ballafaquar me sfida përmes programeve dhe projekteve ambicioze dhe konkrete.

Të gjitha këto projekte zhvillimore ekonomike me një shoqëri të së drejtës që siguron zbutjen e varfërisë, krijimin e vendeve të reja të punës dhe tejkalimin e dallimeve shoqërore do t'i realizojë formacion ynë politik dhe dinamik.

Lëvizja për Drejtësi do të jetë faktor integruar, përqaftues dhe promovues i paqes shoqërore, fuqizues i besimit në mes të institucioneve dhe qytetarëve.

Kosova me të gjitha dallimet dhe ngjashmëritë si dhe me pasuritë e veta ka potencial të madh të bëhet faktor regional stabilizues si promotor e zhvillimit, paqes, lumturisë dhe mirëqenies, si dhe duhet që të udhëhiqet nga njerëz të ndershëm me vullnet politik dhe vendosmëri.